



12 MAY, 2026

Ringgit dijangka mengukuh sekitar RM3.91 minggu ini – Pakar ekonomi

Utusan Malaysia, Malaysia



Ringgit dijangka mengukuh sekitar RM3.91 minggu ini - Pakar ekonomi

Oleh HENDRA WINARNO
hendrawinarno@mediamula.com.my

PETALING JAYA: Ringgit dijangka terus mengukuh ke sekitar paras RM3.91 berbanding dolar Amerika Syarikat (AS) minggu ini, didorong oleh sentimen positif terhadap aliran masuk dana asing, selain keyakinan pasaran terhadap asas ekonomi domestik yang kekal kukuh.

Ia sekali gus berpotensi menjadi pemangkin baharu kepada prestasi Bursa Malaysia terutama melibatkan sektor perbankan, utiliti dan pengguna.

Pada 5 petang semalam, mata wang tempatan ditutup rendah pada 3.9210/3.9260 berbanding 3.9170/3.9220 pada sesi dagangan akhir Jumaat lalu.

Penganalisis ekonomi UniKL Business School, Prof. Madya Dr. Aimi Zulhazmi Abdul Rashid



RINGGIT ditutup rendah kepada 3.9210/3.9260 pada 5 petang semalam

berkata, sektor perbankan dijangka menjadi antara penerima manfaat utama apabila nilai ringgit yang kukuh dapat mengurangkan kos pembiayaan dalam dolar

AS dan membantu meningkatkan pinjaman.

"Kaunter utiliti seperti Tenaga Nasional Berhad dan YTL Power International Berhad turut dilihat

berpotensi mencatat prestasi lebih baik susulan pengurangan beban hutang dalam mata wang asing.

"Selain itu, sektor pengguna dijangka mendapat manfaat daripada kos import bahan mentah yang lebih rendah.

"Dalam pada itu, kaunter eksport seperti Inari Amertron Berhad, Malaysian Pacific Industries Berhad (MPI) dan Top Glove Corporation Berhad dijangka berdepan tekanan berikutan penyusutan nilai pendapatan dalam dolar AS apabila ringgit mengukuh," katanya kepada *Utusan Malaysia*.

Sementara itu, Penganalisis ekonomi, Prof. Emeritus Dr. Barjoyai Bardai berkata, ringgit dijangka diniagakan dalam julat sekitar RM3.80 hingga RM3.95 berbanding dolar AS dengan penganalisis pasaran melihat paras sokongan kukuh pada sekitar

RM3.90 hingga RM3.92.

"Ringgit kini dilihat sebagai antara mata wang berprestasi tinggi susulan sentimen risiko global yang lebih baik, aliran masuk dana yang stabil serta kedudukannya sebagai mata wang berkait dengan eksport tenaga bersih.

"Dalam masa sama, beberapa model pasaran turut menjangkakan potensi pengukuhan kecil pada minggu ini, dengan kemungkinan kadar harian bergerak di bawah paras RM3.90.

"Namun, pergerakan tersebut dijangka kekal tidak menentu berikutan turun naik dalam pasaran pertukaran asing," ujarnya.

Dalam pada itu, Pensyarah Kanan i-CATS University College, Kuching, Profesor Madya Dr. Abu Sofian Yaacob berkata, ringgit nampak agak stabil dan sedikit mengukuh berbanding dolar AS minggu ini.